





ib6

# DISCOVERS

A V ROY,

*Adressé à la Royne Mere.*

M. D. C. XX.

Case

F

39

-326

1620 di

THE NEWBERRY  
LIBRARY



## DISCOVRS AV ROY.

*Adressee à la Roynie Mere.*

**L**E desir d'acquies vne gloire immortelle parmy la posterité, est vn si puissant motif aux genereuses ames, pour dresser leurs actiōs selon la vertu & pour les retirer des choses qui peuuent obscurcir sa beaulté, qu'il est difficile de iuger si ce desir a esté plus souuent cause de belles entreprises, qu'il n'en a empesché de mauuaises. C'est luy qui a produit toutes les merueilles quel'Antiquité no<sup>9</sup> propose à admirer tous les iours, nous contraignāt d'aduouer qu'elles sont plus qu'humaines, par la difficulté que nous auons à les imiter: & qui a destourné plusieurs fois les hommes, particulieremēt les Princes & les Roys des meschancetez, ausquelles leur naturelle grandeur semble les inciter, leur en bailant la puissanec. SIRE, nous croyons que ce desir d'vne gloire immortelle est du tout inutile, & le sera iamais, pour esloigner V. M. des mauuaises entreprises; deux vert<sup>9</sup> dignes d'vn grand Roy, qui sont ses perpetuelles



compagnes ne nous permettent pas seulement de le penser : C'est à sçauoir la Valeur & la Iustice ; les plus cours chemins, plus seurs & plus faciles pour paruenir à l'immortalité. Elles ont toutes deux paru en leur lustre, en deux signalées victoires que vostre Majesté a remportees.

L'une en Bearn, où la Iustice & la pieté semblent auoir desrobé a vostre vaillance l'heureuse issuë d'un glorieux combat ; infailible, si les Huguenots n'eussent fait ioug à vos armes, obeissant à vos commandemens, & empesché au grand contentement de toute la France les calamitez qu'une si longue, & fascheuse guerre pouuoit apporter.

L'autre au Pont de Sé, où les commémors d'une Royale vaillance, ont monstré à la France ce qu'elle doit esperer d'un si genereux courage. Car encores qu'il soit difficile entre toutes les heroïques actiōs, que V. M. propose tous les iours pour exemple à tous les Monarques de la terre, d'en trouuer vne seule où ces deux vertus ne paroissent esgalemēt. Neantmoins elle me permettra de dire libremēt que la valeur a plus paru en celle cy, que la Iustice & que le bruit

des trompettes & des tambours, le cliquer  
des armes, le tonnerre de l'artillerie, le  
choc des armées, la déroute des vaincus:  
fût plustost des effects de vaillance, que de  
Iustice: & si parmy ce tintamarre on la veue  
aller quasi du pair avec vostre vaillâce. Car  
à dire la verité, ie croy que la France  
ne seroit pas en la paix que vostre Majesté  
l'uy conseruera de longues années, si la  
perfidie d'un des Chefs de ce party n'eust  
ioüé son personnage avec la couïardise de  
deux autres; tous trois abandonnâs igno-  
minieusement la place qu'ils auoient entre-  
pris de defédre. Couïardise qui me fait d'ou-  
ter (V. M. me pardonnera si ie l'ose dire,  
puis qu'elle les aduouë pour freres) s'ils fût  
descendus de celuy duquel ils se vantent e-  
stre fils. Car s'il est ainsi que l'on dit, qu'il  
passe aux enfans des semences de la gene-  
rosité, ou bassesse de courage de leur pere:  
il est tresprobable qu'ils ne sont point fils  
de ce grand Alcide, duquel la France ad-  
mirer à iamais les victoires ou bien s'ils le  
sont que ce grand Roy les iugeant aussi in-  
dignes de sa vaillance, comme incapables  
d'heriter des biens qu'il auoit acquis par  
celle; a fait V. M. aussi bien heritiere de

ses vertus, & de la grandeur de son courage que de s<sup>on</sup> royaume. Les deux plus beaux ornemens de sa vie par lesquels il à redu sa memoire immortelle sont ceux là mesmes qu'il vous à laissez comme à son legitime successeur: sa vaillance que vostre M. tasche d'imiter, & sa Iustice laquelle vostre Majesté esgalle par la sienne, qui comme i'ay dit, a faiet voir sa beauté parmy le bruit de vos armes victorieuses.

Premierement en ce qui est du suiet de la guerre, lequel i'ay tousiours creu tresjuste & très equitable, pource qu'il n'y arien de plus iuste qu'un Roy prenne les armes pour punir ses sujets rebelles, & qui cherchent dans la ruine des affaires publiques, quelque chose qui augmente leur profit particulier. Car quoy qu'il soit malaisé à un homme si peu versé aux affaires de l'Estat comme moy, de d'escourir les mysteres secrets, & cachez du gouuernement de ce Royaume, desquels l'esprit de V. M. seulement est capable, & de ceux à qui elle fait l'honneur de les communiquer: si est ce que ie pense veritablement, contre l'opinion de plusieurs, que l'intention de V. M. n'a iamais esté de prendre les armes contre celle quiluy à donné la puissance de les



manier en la mettant au monde : le respect ordinaire que doiuent les enfans à ceux qui leur ont baillé l'estre, n'empesche de le croire. Si toutesfois par la persuation de quelques vns mal affectionnez au bien de vostre estat, ce dangereux dessein s'est mis ou se met iamais d'as vostre ame : ie supplie treshumblement. V. M. de prendre garde, que Dieu ne permette au deffaut de ceux, qui éblouis del'esclat de vostre grandeur royalle, & à cause de l'obligation naturelle qu'ils ont de mourir pour vostre seruice, n'oseroient embrasser sa iuste querelle, que le Ciel, la terre, & les choses inanimées s'arment pour la deffence, contre les auteurs de si mauuais conseils : ou si sa misericorde retient la pesâteur de sō bras, pour leur bailler termes à se repêtir, qu'il ne se trouue quelque plume vëgerese qui publie leurs mauuaises intētiōs à la posterité, afin qu'ils recoiuent à tout le moins d'eternelles maledictiōs pour salaire de leur iniustice. Si dōc le respect & l'amitié que V. M. a deu de tout temps à la Roync sa mere, nous defféd de penser ce que la plus part ont voulu dire : l'amour aussi que cette sage Princesse a tousiours porté reciproquement à V. M. cōme à son fils & à son Roy, s'est monsté tou-

siours avec preuues si certaines, qu'il est impossible de croire qu'apres auoir mis au monde V. M. apres vn soin si particulier de faire instruire vostre ieunesse à l'exercice des vert<sup>9</sup> propres au gouuernemēt d'vn Royau-  
me, apres auoir entretenu la France en vne pleine tranquillité de paix l'espace de quelques années qu'elle a eu les affaires en mainmēt à cause de vostres bas âge, apres l'auoir cōseruée avec vne infinité de trauaux & de peines, pour la mettre si elle eust peu en son entier entre les mains de V. M. ait voulu entreprendre quelque chose pour troubler le repos de vostre Estat.

Il y à deux considerations principales qui nous font, & feront à iamais aymer la Royne vostre mere. L'vne est, qu'elle a esté l'Espouse du plus grand, plus renommé, & plus vaillant Monarque que la terre ayt iamais porté, duquel elle cherit autant la memoire, pour luy auoir donné vn fils maintenant Roy, que pour l'auoir choisie pour sa chere moytié & compagne de sa puissance, L'autre est, qu'elle nous amis au monde vn fils vraiment heritier des incomparables perfections, que Dieu auoit liberalement baillées à son pere. De la premiere il ne reste plus que le souuenir capable d'eterniser sa  
memoi-

memoire auffi bien que celle de son grand Henry. La seconde la fera honorer tant qu'il plaira à Dieu nous conseruer vostre M. car il est presque impossible que les François l'ayment, qu'ils n'ayment aussi celle qui leur a donnee. Si ceste sage Princeſſe entreprenoit quelque chose qui peut nuire à V. M. ſans douter cette ſeconde conſideratiō ſeroit nulle, & effaceroit de nos memoires le ſouuenir de la premiere: & ainſi au lieu del'honneur qu'on luy portoit auparauant, ce qu'elle pourroit obtenir des François ſeroit d'eſtre digne de pitié & cōpaſſion. Cette raiſō nous faiēt croire que la Royne voſtre mere n'a iamais eſté portee de mauuiſe volonte à l'endroiēt de V. M. pource qu'en ce faiſant elle euſt offenſé la memoire de ſon Grād Henry, elle euſt violé les loix del'amour que les meres doiuent porter à leurs enfās: & ainſi ruiné ſō bōheur en alienāt de ſoy les eſpris de toute la Frāce.

Ce qui nous aſſeure que V. M. n'a iamais creu qu'elle ayt rien voulu entreprendre contre voſtre authorité, c'eſt la Juſtice & la Clemēce de laquelle elle a vſé à la ſeule faueur du nō qu'ils auoient empruté à l'endroiēt de ceux auxquels ſous pretexte de ſa deſeſe vouloiēt innouer quelque choſe dās l'Eſtat, les iugeant aſſez punis, l'vn du re-



nom qui ne perira iamais, de sa perfidie, & les deux autres de la lascheté, & poltronnerie qu'ils ont tesmoigné par leur fuite.

Cette mesme Iustice a paru dauātage lors que dvn courage vraymēt magnanime elle a aussi pardonné à ceux, qui allechez de ce beau pretexte, pensoient porter les armes veritablement pour sa deffense. Entre lesquels le Comte de S. Aignan combatant vaillamment soustint l'effort de ceux qui franchissoient les tranches & s'opposa assisté de peu de gens comme vn rempart à leur impetuosité : en fin le nombre des siens estant inegal à celuy des assaillans, & lassé de la multitude des coups qu'il falloit parer à tous momens, fut contraint de se rendre à la mercy du vainqueur, lequel il a experimenté aussi clement que iuste : veu que non seulement V. M. paya sa rançon, mais en cores l'enuoya avec des louanges de sa valeur, qui ne peuuent estre que grandes venāt de la bouche d'vn grand Roy. Le Viconte de Betancour a experimenté la mesme clemence avec autant de Iustice, apres auoir deffendu le Chasteau le reste du iour & toute la nuit, apres auoir fourny de balles au soldat, en fondant sa propre vaisselle, pour en seruir d'vn mauuais re-



pas ceux qui en furent attraints, en fin obtint composition de V. M. aussi digne d'une Royale Iustice, comme de la vaillance d'un si brave Capitaine.

Du Tiers, Cornette de la compagnie de la Roynemere, à bien peu cédé à mon aduis en vaillance à ces deux cy : aussi V. M. na rien rabaissé de sa Iustice en son endroit. Certui cy entendant à tous momēs que l'on estoit aux mains au pont de Sé, impatient de combattre, part d'Angers accompagné de vingt cheuaux seulement, & apres auoir perdu quatre de ses gens sur le chemiu, se iette dans la plaine, affronte un gros de cauallerie, ses gens en blessent quelques vns, en fin ayās réduit tout ce qu'il estoit possible de combat, s'estans ralliez plusieurs fois, ils ne se trouuent plus que quatre ou cinq incapables de resister long temps au mode de ceux qui les attaquoient. Du Tiers est porté par terre d'un coup de pistolet à la gorge, qui ne fut pas mortel, ses compagnons blesez leurs cheuaux tuez, & partant faits prisonniers de guerre avec luy. A cause d'une si grande vaillance, V. M. les renuoya sans rançon, non obstant l'aduis d'un des plus grands de vostre arée, qui leur dist deux ou trois fois : *Encores que*

*vous soyez Gentils-hommes le Roy vous deueroit  
tous faire pendre :* Sentence à verité digne  
d'un Preuost des Mareschaux contre des  
voleurs, non pas d'un Prince contre de  
vaillans Gentils-hommes: ou bien pour  
l'excuser, il faut dire que celuy qui ayme &  
idolatre la seule beauté des hommes, est  
incapable d'admirer leur vaillance.

C'est vn grand signe de Vaillance, SIRE,  
qui est en vostre M. de la sçauoir recognoi-  
stre mesme en son ennemy, & vne grande  
Iustice de la recompenser. Combien que  
cette vertu de laquelle le surnom est tres-  
iustement deu à vostre Majesté, ayt meri-  
té d'infinies louanges aux actions que ie  
viens de raconter: si est-ce qu'il semble  
que vostre vaillance ayt aucunement ob-  
cuscison lustre, par l'esclat de sa victoire &  
de son triomphe. Mais en Bearn c'est el-  
le qui a remporté la gloire de tout ce qui  
s'y est passé, & a d'autant surmonré vo-  
stre valeur, que l'establissement de la  
Religion Catholique est de plus d'import-  
tance à cet Estat, que la victoire du Pont  
de Sé: Et ie croy qu'il n'y a personne qui  
n'ayme mieux voir vostre Majesté avec  
toute sa Cour suiure en procession le saint  
Sacrement à Pau, faire dire la Messe, re-

mettre les Euesques en leurs premieres dignitez, bref establir la Religion Catholique en toutes les parties de vostre Royaume, que de voir la France si puissante & si redoutable aux nations estrangeres, qui ne l'oseroiēt attaquer, se cōsumer elle mesme, & se ruiner en guerres ciuiles. Ce n'a pas esté vne petite gloire à vostre Majesté en vn si ieune âge de dōner bataille, prédre le cāp emporter la place q̄ l'on tenoit cōtre elle: mais cela ne s'est pas fait sās la perte de beaucoup de vaillans hommes de l'vn & de l'autre party; perte qui est & sera à iamais lamentable à la France. Pour la deffense des tranches moururent quelques Gētils-hommes des gardes de la Royne, & en mourant rauirent des mains de V. M. vne occasion digne de faire paroistre sa clemēce & sa Iustice. Entre les assailans monsieur de Nerestan & monsieur des Marests ont esté les plus regrettez' Cettuicy pour l'esperance qu'on auoit de sa valeur, laquelle a esté estoufee dès sa naissance: l'autre; pource qu'apres auoir seruy ce grand Henry en toutes ses guerres, & puis V. M. sēble estre venu par vne fatale necessité finir ses iours sous les murailles d'vne bicocque: heureux certes s'il eust perdu la



vic à l'affaut d'une plus celebre place, ou en  
une plus renommee bataille : & tous deux  
dignes de mourir pour vn meilleur suiet.

On n'a point veu de massacres en Bearn,  
on n'a point veu de sang ruisleler par la  
plaine, on n'a point veu la terre paucee de  
corps morts ; on l'a veuë semee de fleu-  
rs, l'air parfumé d'encens retentir des  
loüanges & benedictions que tout le mō-  
de donnoit à l'enuy à vostre Iustice,  
on a veu les feux allumez tesmoigner la  
ioye de tout le peuple : enfin l'eau de cou-  
ler en larmes des yeux des Huguenots par  
tristesse ; des Catholiques, à cause de leur  
ioye, à fin que cet element ne demeurast  
seul sans auoir part à vostre triomphe.

Il est donc vray SIRE, que comme vostre  
valeur semble auoir aucunement empor-  
té le dessus de vostre Iustice à la victoire  
du Pont de Sé : aussi faut il maintenant  
à son tour qu'elle cede & confesse, que  
ces pacifiques actions sont plustost de  
iustice & de pieté que de vaillance, quoy  
quelle ayt beaucoup serui en cet affaire. Ce  
sont ces dux' vetus SIRE, que V. M. apar  
succession de Henry le Grand, qui luy ont  
donné ces deux victoires, & luy en pro-  
mettent bien d'autres. Ce sont elles qui la



15  
feront aymable à ses sujets, redoutable à  
ses ennemys, exemple à tous les Monar-  
ques de la terre ; la feront admirer de tout  
le monde : enfin eterniseront la memoire  
de son nom , & la rendront immortelle.

F I N





